

長
離
閣
集



長離閣集

王采薇撰

叢書集成初編

(補印本)

長 離 閣 集

一九三七年六月初版
一九五九年十月補印

王 采 薇 撰

商務印書館出版

上海大眾文化印刷廠印刷

長離閣詩集序

曲阜孔廣森

昔靜女之三章。取彤管焉。被壽人於笙磬。非無都蕩之詞。列緝宿于義娥。不廢葦杭之怨。葛山少婦。執越布以歌勞。柘館貞嬪。裂齊紈而歎逝。書之硯北。盡金屋之奇才。選入江東。卽玉臺之新詠。女子善懷。香奩尙已。則有通華胄望。淑慎閨儀。南國新人。東家舊姓。十三織素。二七裁衣。漱潤藪于瓜年。剡芳名于茗玉。長言婉婉。女師德象之篇。好句流連。吉甫清風之誦。前身蓮葉。不踐陳泥。他日椒花。必多新製。況復鴛鴦左顧。孔雀南飛。歸小婦之高堂。調弦錦瑟。識上頭之夫婿。絡轡青絲。鑪熏夕而共香。鏡照塵而同影。司空博物。本兒女之多情。內史工書。作夫人之弟子。斯又王郎天壤。愧此多能。居士桑榆。羨其嘉耦者也。若夫紅羅帳掩。朱鳥窗開。初成墮馬之妝。自服游龍之彩。繡餘茵茗。倦卽停鍼。製就茱萸。織常當戶。莫不語緣情靡。感與候遷。牙管一雙。金釭二等。雪凝謝苑。擬飛絮于風前。日出秦樓。歌條桑于陌上。至如雙聲讀曲。十索名題。陽羨新茶。袖書鬪罷。南安早栗。故事疏來。香沈水而郎歌。繭懸絲而妾和。西陵松柏。便結同心。北地焉支。彌增善睐。香囊叩叩。是繁縷之定情。雜珮珊珊。有鄭姬之驚夜。爰止爲歡。玉女爭投百箭之驍。射雉珠臯。始見三年之笑。又如草生南浦。梅下西洲。贈子將離。呼卿小別。葦藍盈匊。指五日以爲期。蕭艾懷人。比三秋而更遠。遺簪紹繚。破鏡連環。書檢六張。文周四角。蘭成集上。曾裁寄婦之言。徐淑詩中。不少望夫之什。亦或少君歸里。對挽鹿車。侯光去吳。仍偕鴻婦。漢水之平塗七百。江陵之遠道三千。春嶂青螺。

來發雙蛾之色。秋波白鷺。迴成九曲之珠。是則七邑東征。曹家善賦。百泉舟楫。衛女寫憂。抑亦詩發乎情。情生于文者與。然而蓉生江上。杏倚雲邊。未免牢愁。誰能理遣。重以諸姬適邨。永歎肥泉。季娣歸鄆。先零弱歲。芝焚易感。蕙質何堪。幾日飛龍。祇愁藥店。數聲別鵲。忽上琴絲。簾塵則榻冷琉璃。吟筆則牀空翡翠。左思嬌女。能無失母之悲。班固佳甥。應有問神之作。於是子荆改服。文度多傷。求故劍于箱簾。綴遺翰于鏡檻。紅桃麗字。遂書河北之箋。白蠟妍辭。徧識閨中之媛。而或者謂結璘有藥。弄玉凝仙。三髻雲鬟。蓬壺已隔。層波羅轡。洛浦仍逢。倘作異聞。傳諸好事。則綢繆贈答。將皆戴勝之瑤觴。宛轉聲音。盡入彩鸞之唐韻。

閨閣而工吟咏。事之韻者也。綠窗名藁。伽音著集。風雅之家述焉。然大致不外賦草題花。抽青媲白。非必有驚人之句。超詣之作。鄭貞懿云。近世婦人女子作詩。率皆纖艷萎靡。桐城方夫人云。偶爾識字。堆積齷齪。信手成篇。由斯以論。亶其然乎。余觀王孺人薇閣偶存詩。有異焉。其思幽以沉。其言超以雋。揚激楚之清音。役精空之妙手。蓋雖苦吟。雅宗之士有所不逮。可謂體絕香奩。才雄巾幗者已。聞孺人端麗明慧。熟漢晉書。工楷法。多才藝。顧年僅二十四而化去。屠氏湘靈。袁家君嫵。折玉埋香。古今同歎。其詩尙有二百餘首。尊人菽山先生索之未至。茲所見者。才三四十篇而已。菽山先生將以授梓。屬余爲點定。爰弁數言於簡端云。閩縣葉觀國。

序薇閣偶存詩草畢。復題長律一首。

容華刻玉氣吹蘭。綃帙長隨鏡檻安。罷繡吟成藤紙貴。留香草在墨池寒。生天有籍宜忉利。住世無多似小鸞。若向詩家論格力。長江昌谷重登壇。罷繡吟。侯官女郎王虞鳳著。留香草。合劉屠珩。瑟沈天孫詩。

薇閣偶存弁言

閩縣何森林

東鄰黝女。爭傳賦茗之才。南國佳人。競做簪花之格。紫絲步障。時落譚鋒。青玉華軒。頻翻絮雪。鮮妍翰墨。居然衛氏夫人。英雋才華。允矣袁家學士。豈特釵鳳鏡鸞之句。妙著新妝。亦非香蘭醉草之吟。代傳白燭者也。觀薇閣偶存詩集。併讀小傳。知爲毘陵女士。姓王氏。名采薇。別字玉瑛。乃武進王明府菰山老先生之第四女。句容廣文孫君書屏老先生之冢婦。而茂才孫淵如之德配也。靈慧夙成。岐嶷蚤異。蔡文姬六歲辨琴。徐惠娘八齡作賦。端莊靜一。不愧林下風姿。貞淑幽閒。羣仰閨中儒雅。誠所謂埽眉才子。當不徒刺繡神鍼。無何零陵道上。倏逢解脫之緣。女兒山頭。竟作飛昇之路。振珮環於天上。餘韻無聲。留詩卷於人間。靈膏不散。瓊鐙灰冷。三更好月空明。寶篆風微。一縷游絲。竟去掌天厨之九百。天地人寶藏兼司。檢月牘於三千。始中終夙根未斷。茅君西畔。夢訂後期。忉利東偏。詩傳前事。考月夕之分數。兼聽鴻溝。偵灰墮而遲留。空悲慧劫。絳河已杳。長居離恨之天。青鳥不來。永隔塵緣之路。聆鐘聲於闕下。蓬島宵分。泡露氣於宮中。瑤臺夜迴。五霞洞掩。已鞭鹿而逍遙。一足童來。枉焚香而睇視。覩流雲之黯黯。密緒千絲。聽珮玉之錚錚。芳魂百匝。靈雖長在。總杳杳而冥冥。見卽如初。亦生生而世世。語雖涉怪。事卻非誣。傳密思於仙娥。皆堪訂證。寄遙情于乩筆。孰語荒唐。願遺事之可傳。究仙蹤之莫挽。就使樂天長在。徒刊紫石之文。劇憐牛女云亡。空誦遺芳之稿。爰吟

短截聊當輓歌。謹撰弁言。用申哀誄云爾。

翡翠玻璃得所於絳仙才調女相如。玉京難覓脩文客。珍重紅妝作校書。
殿居忉利鬱巍峩。青鳥西來隔絳河。惆悵昆庭石公子。吹笙可處聽雲和。
偶來塵世了前因。知是蓬壺第幾人。却火灰殘天地老。白楊青草石磷磷。
幻影遄馳廿四春。瑤環莫認去來身。劇憐故國招魂地。曾否趨庭晤老親。

題辭

并序

三山張經邦

薇閣偶存者。毘陵王菽山先生第四女玉璣女士遺草也。玉璣不櫛書生。埽眉才子。楊盈川之女。少賦金釵。王內史之妻。幼工絮雪。性獨耽吟詠。手不釋夫篇章。鸛鴒硯中。罕點石州螺黛。鷓鴣香畔。恆攤蜀郡蠻箋。重以案側伯鸞。人間司馬。才真勁敵。歡比良朋。從枕上以論詩。直欲遠宗四傑。向花間而吮筆。非關頻埽雙蛾。意必探珠。音還憂玉。以庚庚之妙理。運乙乙之幽思。斯固慧勝文人。詣超巾幗者矣。詎意優曇一現。僅開頃刻之花。切利先歸。遂駕長離之鳳。芳園豆落。祇結相思。露井桃殘。竟成薄命。嗚呼。天閻難問。呼妙子以何從。仙路非遙。幸巫咸之可叩。爰憑青鳥。還寄素書。掌玉殿之縹緲。勝彼瑯嬛百架。降瑤天之咳唾。裁將金簡一函。密語深情。不數分釵擘盒。青天碧海。空懸夢雨。靈旗噫。王子登不踐紅塵。董雙成虛傳遠信。興思及此。厥痛何如。是以菽山先生。先示一斑於梨棗。而淵如孫子。尙尋斷夢於稠桑。雖令方朔術窮。迷雲輿兮八極。尙冀劉生傳在。貽彤管以千秋。用敘長歌。聊充哀誄。祇慙禿穎。莫罄靈奇爾。

瑤光炯炯煥天章。散彩遙臨大道王。第一仙人同妙想。次三神女亞卮娘。珊瑚風度離仙闕。慧質明眸朗秋月。似吹芳氣作蘭言。疑隔冰牕見香骨。仙女昌容隔牕見骨愛繙細帙近簾裾。少小先工倒薤書。鳳唳平連金翡翠。菱花移傍玉蟾蜍。更有清才薄柔靡。揮毫獨把鉛華洗。俊逸寧如罷繡險。精深眞陋香奩體。詩成高唱

入層霄。露滿瑤臺奏六么。跋膝聲凝雙鳳管。參差音颺九鸞翹。夫壻由來亦仙客。碧虛宮裏曾偕謫。天台
雄賦擲金聲。零雨清吟擘銀畫。階前唱和月痕斜。趙管風流未足誇。那知一夜飄蕭雨。落盡同心姊妹花。
從此朱顏減歡思。投琴獨灑看花淚。孺人以悼姊致疾花如人面不禁秋。流雲爲車鶴銜轡。用薇閣句渺渺茫茫離
恨天。水晶闕外住霞輶。反瓶覆水空悲咽。難寄桐君十幅箋。脈望薰殘檢書暇。鏘然風送仙音下。董雙成
到步虛輕。一足童回寒漏罷。噫吁乎。上界真人游戲歸。祇餘荀令斷腸詩。願將別鶴離鸞曲。寫作芙蓉閨
苑詞。

讀長離閣詩漫題卷末

儀徵阮元

青鐙涼涼夜如水。魂黯心香動殘紙。病意多從別後添。吟懷已在生前死。琉璃硯匣彩雲天。好事人間那
得堅。玉臺空有傷神句。鏡裏宮花破不圓。

長離閣集目錄

長離閣集一卷詩七十一首詞一首

燕燕子飛

山中作

自君之出矣

山中憶吳如霞姊

復與季逯夜起視月同作

池上書寄薇隱

望夫石

香草河舟晚

曉步

夢遊

秋胡

蘭芝曲

華清曲

昆靈曲

前樓

句容齋舍

寒食吟

秋夜答季述

夢天

春眠曲

夏行曲

秋望曲

冬坐曲

木蘭詞

春暝曲

離居曲

霽行曲

病中憶歸效簡文卦名詩

曉起效徐陵體

早起憶弟婦

銅雀臺

不眠

曲渚

山空

雨夜

病臥得季述詩

送春

山夕

幻夢

初春

山夕

夢起步後園

半領和薇隱韻

舟次

有感

水宿

九月十四日舟由丹徒夜半與薇隱乘月登岸行三里作

寄薇隱次韻

山齋病起憶亡姊

答薇隱復次前韻

悼姊

寄季述時客和州

空室

山夕

蔣墅舟次和季述下第有

七夕悼姊

憶別和薇隱

晚立

二月十七日東薇隱

得薇隱從金陵寄一書

三月三日

夢起

寄父

空樓哭亡姊

春夕

秋夜不寐

哭姊

臥病

向夜

偶成

歸寧後尋亡姊故居

夢中作

又

幽夢

寄季述

回文

和薇隱韻醉花陰

附小傳

事狀

墓誌銘

長離閣集卷一

清 毘陵王采薇撰

燕燕于飛

流光何暉暉。暉暉亂春日。獨燕銜愁來。懸飛鏡池淥。池淥何多情。堂空復孤驚。羽豐離其窠。哺足辭所生。回身顧新侶。得食哀哀鳴。

山中作

夜松何濛濛。月小飛不起。知有抱瑟人。垂光碧簾底。露氣明曲巖。花光照虛夜。一片白雲聲。飛泉隔煙瀉。自君之出矣。

兩瘦不相識。炯心如流丹。掬贈焉可得。

山中憶吳如霞姊

帷鐙照宵衾。澗水聞夜室。天靜遠烟搖。華雲度流月。幽棲亦心好。思子方首疾。憶昨寄遠書。淒淒淚盈帙。生愁一何滋。少樂從是畢。虛房想清讌。蛾響落清瑟。何由寄新吟。慰我中似結。

復與季遠夜起視月同作

虛扉浹宵開。涼鐙照幽素。肅肅鴉不翻。團團雲稍去。蛩底聞行泉。簪黑辨浮露。外役于此捐。中疴自茲愈。循階桂華歇。交戶瓜蔓吐。徒乖有懷衷。未協長往趣。亦有同心人。斯情積難訴。